

2 TIMOSEEWO

Essuula : **1** 2 3 4

ESSUULA 1

Pawulo, omutume wa Kristo Yesu olw'okwagala kwa Katonda, ng'okusuubiza bwe kuli okw'obulamu obuli mu Kristo Yesu,

² eri Timoseewo, omwana wange omwagalwa: ekisa, okusaasira, emirembe ebiva eri Katonda Kitaffe ne Kristo Yesu Mukama waffe bituuke gy'oli.

³ Nneebaza Katonda gwe mpeereza okuva ku bajjajjange mu mwoyo omulungi, bwe nkujjukira obutayosa mu kusaba kwange emisana n'ekiro

⁴ nga nkulumirwa okukulaba, bwe njjukira amaziga go, ndyoke njijule essanyu;

⁵ bwe nnajjukizibwa okukkiriza okutali kwa bukuusa okuli mu ggwe; okwabeeranga olubereberye mu jjajjaawo Looyi ne mu nnyoko Ewuniike, era ntegeeredde ddala nga kuli ne mu ggwe.

⁶ Kyenva nkujjukiza okuseesanga ekirabo kya Katonda ekiri mu ggwe olw'okuteekebwako emikono gyange.

⁷ Kubanga Katonda teyatuwa ffe omwoyo ogw'okutya, wabula ogw'amaanyi era ogw'okwagala era ogw'okwegenderezanga.

⁸ Kale, tokwatirwanga nsonyi kutegeeza kwa Mukama waffe, newakubadde nze omusibe we: naye obonyaabonyezebwanga wamu n'enjiri ng'amaanyi ga Katonda bwe gali;

⁹ eyatulokola n'atuyita okuyita okutukuvu, si ng'ebikolwa byaffe bwe biri, wabula okumalirira kwe ye n'ekisa bwe biri, kye twaweerwa mu Kristo Yesu emirembe n'emirembe nga teginnabaawo,

¹⁰ naye kirabisibwa kaakano olw'okwolesebwa kw'Omulokozi waffe Kristo Yesu, eyaggyawo okufa n'amulisa obulamu n'obutazikirira olw'enjiri,

¹¹ gye nnateekerwawo omubuulizi era omutume era omuyigiriza.

¹² Era kyenva mbonaabona bwe ntyo: naye sikwatibwa nsonyi; kubanga mmanyi gwe nnakkiriza, ne ntegeerera ddala ng'ayinza okukuumanga kye nnamuteresa okutuusa ku lunaku luli.

¹³ Nywezanga ekyokulabirako eky'ebigambo eby'obulamu bye wawuliranga gye ndi, mu kukkiriza ne mu kwagala okuli mu Kristo Yesu.

¹⁴ Ekintu ekirungi kye wateresebwa okikuumenga n'Omwoyo Omutukuvu, abeera mufte.

¹⁵ Kino okimanyi nga bonna abali mu Asiya bankuba amabega; ku abo ye Fugero ne Kerumogene.

¹⁶ Mukama waffe asaasire ennyumba ya Onesifolo: kubanga yampummuzanga emirundi mingi, so teyakwatirwa nsonyi lujegere lwange,

- ¹⁷ naye bwe yali mu Ruumi n'anyiikira okunnoonya n'okulaba n'andaba
- ¹⁸ (Mukama waffe amuwe okulaba okusaasirwa eri Mukama waffe ku lunaku luli); era n'okuweereza kwonna kwe yaweerezanga mu Efeso, ggwe okutegeera bulungi nnyo.

ESSUULA 2

Kale ggwe, mwana wange, beeranga wa maanyi mu kisa ekiri mu Kristo Yesu.

² Era bye wawuliranga gye ndi mu bajulirwa abangi, ebyo biteresenga abantu abeesigwa, era abalisaanira okuyigiriza n'abalala.

³ Bonaboneranga wamu nange ng'omulwanyi omulungi owa Kristo Yesu.

⁴ Siwali mulwanyi bw'atabaala eyeeyingiza mu mitawaana egy'obulamu buno, alyoke asiimibwe eyamuwandika okuba omulwanyi.

⁵ Naye era omuntu bw'awakana, taweebwa ngule bw'atawakana nga bwe kiragirwa.

⁶ Omulimi akola emirimu kimugwanira okusooka okutwala ku bibala.

⁷ Lowooza kye njogedde; kubanga Mukama waffe anaakuwanga okutegeera mu bigambo byonna.

⁸ Jjukira Yesu Kristo, nga yazuukira mu bafu, ow'omu zzadde lya Dawudi, ng'enjiri yange bw'eyogera:

⁹ gye mbonaboneramu okutuusa ku kusibibwa, ng'akola obubi; naye ekigambo kya Katonda tekisibibwa.

¹⁰ Kyenya ngumiikiriza byonna olw'abalonde, era nabo balyoke bafune obulokovu obuli mu Kristo Yesu, wamu n'ekitiibwa ekitaggwaawo.

¹¹ Ekigambo kino kyesigwa nti Kuba oba nga twafa naye, era tulibeera balamu naye

¹² oba nga tugumiikiriza, era tulifuga naye: oba nga tulimwegaana era naye alitwegaana ffe:

¹³ oba nga tetukkiriza, ye abeera mwesigwa kubanga tayinza kwerimba.

¹⁴ Ebyo obibajjukizanga, ng'obakuutirira mu maaso ga Mukama waffe, obutalwananga na bigambo ebitagasa, ebikyamya abawulira.

¹⁵ Fubanga okweraga ng'osiimibwa Katonda, omukozi atakwatibwa nsonyi, ayisa wakati ekigambo eky'amazima.

¹⁶ Naye ebigambo ebitaliimu ebitali bya ddiini obywewalanga: kubanga baliyitirira mu butatya Katonda,

¹⁷ n'ekigambo kyabwe kirirya nga kookolo: ku abo ye Kumenayo ne Fireeto;

¹⁸ kubanga baakyama mu mazima, nga boogera ng'okuzuukira kwamala okubeerawo, era waliwo abantu be baavuunikirira okukkiriza kwabwe.

¹⁹ Naye omusingi gwa Katonda omugumu gubeerawo, nga gulina akabonero kano nti Mukama waffe amanyi ababe: era nti Yeewalenga obutali butuukirivu buli ayatula erinnya lya Mukama waffe.

²⁰ Naye mu nnyumba ennene temubaamu bintu bya zaabu na bya ffeeza byokka, naye era n'eby'emititi n'eby'ebbumba; n'ebirala eby'ekitiibwa, n'ebirala ebitali bya kitiibwa

²¹ Kale omuntu bwe yeerongoosaako ebyo, anaabeeranga ekintu eky'ekitiibwa, ekyatukuzibwa, ekisaanira omwami okuweerezanga ekyalongooserezebwa buli mulimu omulungi.

²² Naye okwegomba okw'omu buvubuka okwewalanga naye ogobereranga obutuukirivu, okukkiriza, okwagala, emirembe awamu n'abo abamusaba Mukama waffe mu mwoyo omulongoofu.

²³ Naye empaka ez'obusirusiru era ez'obutayigirizibwa ozirekanga, ng'omanyi nga zizaala okulwana.

²⁴ Naye omuddu wa Mukama waffe tekimugwanira kulwananga, wabula okubeeranga omukkakkamu eri bonna, omuyigiriza, omugumiikiriza,

²⁵ abulirira n'obuwombeefu abawakanyi, mpozzi oba nga Katonda alibawa okwenenya olw'okutegeerera ddala amazima,

²⁶ era balitamiirukuka okuva mu mutego gwa Setaani, oyo ng'amaze okubakwasa okukolanga okwagala kwe.

ESSUULA 3

Naye tegeera kino nga mu nnaku ez'oluvannyuma ebiro eby'okulaba ennaku birijja.

² Kubanga abantu baliba nga beeyagala bokka, abaagala ebintu, abeenyumiriza, ab'amalala, abavumi, abatagondera bazadde baabwe, abateebaza, abatali batukuvu,

³ abatayagala ba luganda, abatatabagana, abawaayiriza, abateegendereza, abakambwe, abatayagala bulungi,

⁴ ab'enkwe, abakakanyavu, abeegulumiza, abaagala essanyu okusinga Katonda;

⁵ nga balina ekifaananyi ky'okutya Katonda, naye nga beegaana amaanyi gaakwo: era nabo obakubanga amabega.

⁶ Kubanga ku abo be bantu abasensera mu nnyumba ne banyaga abakazi abasirusiru abazitoowererwa ebibi ebingi, abafugibwa okwegomba okutali kumu,

⁷ abayiga bulijjo, ne batayinza ennaku zonna kutuuka ku kutegeerera ddala mazima.

⁸ Era nga Yane ne Yambere bwe baaziya Musa, ne bano bwe batyo baziya amazima; bayonooneka amagezi gaabwe, abataxiimibwa mu kukkiriza.

⁹ Naye tebalyeyongerako kuyitirira: kubanga obusirusiru bwabwe bulitegeererwa ddala abantu bonna, era ng'obwa bali bwe bwali.

¹⁰ Naye gwe wagoberera nnyo okuyigiriza kwange, empisa zange, okuteesa kwange, okukkiriza kwange, okugumiikiriza kwange, okwagala kwange, okulindirira kwange,

¹¹ okuyigganyizibwa kwange, okubonaabona kwange; ebyambeerako mu Antiyokiya, mu Ikoniyo, mu Lusitula; okuyigganyizibwa kwe nnayigganyizibwanga bwe kwali: era Mukama waffe yandokola mu byonna.

¹² Naye era bonna abaagala mu Kristo Yesu okukwatanga empisa ez'okutya Katonda banaayigganyizibwanga.

¹³ Naye abantu ababi n'abeetulinkirira balyeyongerako okuyitiriranga mu bubi, nga balimba era nga balimbibwa.

¹⁴ Naye ggwe beeranga mu ebyo bye wayiga n'otegeerera ddala, ng'omanyi abakuyigiriza bwe bali;

¹⁵ era ng'okuva mu buto wamanyanga ebyawandiikibwa ebitukuvu ebiyinda okukugeziwaza okuyingira mu bulokovu olw'okukkiriza okuli mu Kristo Yesu.

¹⁶ Buli ekyawandiikibwa kirina okulung'anyama kwa Katonda, era kigasa olw'okuyigirizanga, olw'okunenya, olw'okutereezanga, olw'okubuulira okuli mu butuukirivu;

¹⁷ omuntu wa Katonda alemenga okubulwa kyonna kyonna, ng'alina ddala byonna olwa buli mulimu omulungi.

ESSUULA 4

Nkukuutirira mu maaso ga Katonda ne Kristo Yesu, alisalira omusango abalamu n'abafu, era n'olw'okulabika kwe n'obwakabaka bwe;

² buuliranga ekigambo; kubirizanga mu bbanga erisaaniramu n'eritasaaniramu; weranga, nenyanga, buuliranga n'okugumiikiriza kwonna n'okuyigiriza.

³ Kubanga ebiro birijja lwe batalikkiriza kuwulira kuyigiriza kwa bulamu; naye, amatu nga gabasiwa, balikunjaanya abayigiriza ng'okwegomba kwabwe bo bwe kuli;

⁴ baliziba amatu okulekanga amazima, balikyama okugobereranga enfumo obufumo.

⁵ Naye ggwe tamiirukukanga mu byonna, bonaabonanga, kolanga omulimu ogw'omubuulizi w'enjiri, tuukirizanga okuweereza kwo.

⁶ Kubanga nze kaakano nfukibwa, n'ebiro eby'okuteebwa kwange bituuse.

⁷ Nnwanye okulwana okulungi, olugendo ndutuusizza, okukkiriza nkukuumye:

⁸ ekisigaddeyo, enterekeddwa engule ey'obutuukirivu Mukama waffe gy'alimpeera ku lunaku luli, asala emisango egy'ensonga: so si nze nzekka naye era ne bonna abaagala okulabika kwe.

⁹ Fuba okujja gye ndi mangu:

¹⁰ kubanga Dema yandekawo, ng'ayagala emirembe egya kaakano, n'agenda e Ssessaloniika; Kulesuke e Ggalatiya, Tito e Dalumatiya.

¹¹ Lukka ye ali awamu nange yekka. Twala Makko, omuleete wamu naawe; kubanga angasa olw'okuweereza.

¹² Naye Tukiko nnamutuma mu Efeso.

¹³ Ekyambalo kye nnaleka mu Tulowa ewa Kappo, bw'oliba ng'ojja, kireete, n'ebitabo, naye, okusinga, biri eby'amaliba.

¹⁴ Alegezanda omuweesi w'ebikomo yankola obubi bungi: Mukama waffe alimusasula ng'ebikolwa bye bwe byali:

¹⁵ oyo naawe omwekumanga; kubanga yaziya nnyo ebigambo byaffe.

¹⁶ Mu kuwoza kwange okw'olubereberye siwali eyannyamba, naye bonna banjabulira: nsaba baleme okukibaliwa.

¹⁷ Naye Mukama waffe yayimirira kumpi nange, n'ampa amaanyi; nze ndyoke ntuukirize kye mbuulira, era ab'amawanga bonna balyoke bawulire: ne ndokoka mu kamwa k'empologoma.

¹⁸ Mukama waffe anandokolanga mu buli kikulwa ekibi, era anankuumanga okutuusa ku bwakabaka bwe obw'omu ggulu: aweebwenga ekitiibwa emirembe n'emirembe. Amiina.

¹⁹ Lamusa Pulisika ne Akula, n'ennyumba ya Onesifolo.

²⁰ Erasuto yabeera mu Kkolinso: naye Tulofiimo nnamuleka mu Mireeto ng'alwadde.

²¹ Fuba okujja ebiro by'empewo nga tebinnatuuka. Ewubulo akulamusizza, ne Pudente, ne Lino, ne Kulawudiya, n'ab'oluganda bonna.

²² Mukama waffe abeerenga n'omwoyo gwo. Ekisa kibeerenga nammwe.

For other languages please go to www.wordproject.org